



## Pahang sedia peruntukan RM8 juta naik taraf TKPM Jelai

Oleh: Roselan Ab Malek - Januari 23, 2023 @ 12:28pm  
bhnews@bh.com.my



Wan Rosdy ketika mengadakan lawatan ke. Taman Kekal Pengeluaran Makanan (TKPM) Jelai. - Foto NSYP/Roselan Ab Malek

LIPIS: Kerajaan Negeri Pahang meluluskan peruntukan RM8 juta bagi menaiktaraf Taman Kekal Pengeluaran Makanan (TKPM) Jelai, di sini.

Menteri Besar Pahang, Datuk Seri Wan Rosdy Wan Ismail, berkata terdapat beberapa perkara yang perlu diberi perhatian terutamanya membabitkan infrastruktur asas di TKPM Jelai yang perlu ditingkatkan.

Beliau berkata, peruntukan yang diluluskan itu bagi meningkatkan infrastruktur asas seperti jalan raya, talian elektrik, bekalan air dan kerja pembersihan kawasan.

Terdahulu, Wan Rosdy melawat TKPM Jelai untuk melihat sendiri perkembangan projek tanaman nangka madu di kawasan itu.

"Secara keseluruhannya saya berpuas hati terhadap perjalanan projek yang diusahakan penduduk setempat di atas tanah seluas 200 hektar ini.

"Walaupun bagaimanapun, terdapat beberapa perkara yang perlu saya beri perhatian terutamanya membabitkan infrastruktur asas yang perlu ditingkatkan lagi," katanya.

Wan Rosdy berkata, dengan adanya infrastruktur asas ini diharap dapat memberi keselesaan kepada pekerja sekali gus meningkatkan pengeluaran hasil tanaman di TKPM Jelai.

Beliau berkata, kerajaan negeri akan sentiasa memantau perkembangan semasa projek penyediaan infrastruktur itu bagi memastikan ia berjalan lancar dan siap pada waktu yang ditetapkan.

Dalam perkembangan lain, Wan Rosdy turut meluluskan peruntukan RM5 juta bagi mengatasi kejadian banjir di Kampung Beletik dan Kampung Lubuk Kulit dekat sini yang sering dilanda banjir kilat setiap kali hujan lebat.

"Saya berharap dengan adanya peruntukan yang akan dikendalikan oleh Jabatan Pengairan dan Saliran (JPS) Pahang, masalah banjir kilat yang sering berlaku di kedua-dua kampung itu dapat diatasi," katanya.